

CUSSEGL GROND

Sessiun da favrer 2024

Dumonda Bardill concernent in post independent per l'annunzia da conflicts tranter personas privatas ed autoritads

Ils champs d'incumbensa dal maun public èn multifars e complexs. En blers secturs datti in barat direct cun la populaziun. Ina gronda part da la lavur vegn dentant er prestada senza in stretg contact cun las personas pertutgadas. En il cas ideal vegnan las mesiras, sco las expertisas, ils scleriments, las surveglianzas, las disposiziuns, las execuziuns e.u.v., prendidas per mauns en enclegientscha cun las personas involvidas. La sensibilitad dals uffizis e dals posts da servetsch chantunals envers las pretensiuns da la populaziun è gronda. Ins sa stenta da prender serius ils basegns da las personas.

Malgrà las autas pretensiuns da qualidad n'èsi betg exclus, che la relaziun tranter in'autoridad ed ina persona singula sa pegiurescha pervia da la perdita da confidenza vicendaivla u pervia d'opiniuns cuntracurrentas. Sche la protecziun da la persunalitad vegn violada per exempel pervia da sbagls da la polizia en ina descripziun curta d'in mandat penal, po ina persona che n'è betg participada a la procedura, vegnir en ina situaziun precara.

Ir davant dretgira perquai ch'ins suppona ch'ina autoridad haja fatg in sbagl, è ina greva chargia, tant psichica, temporala, dentant er finanziaria, per tut las personas involvidas. Personas privatas che na pon betg sa defender en moda adequata, perquai ch'ellas n'enconuschan betg bain il sistem giuridic, sa sentan expostas a l'arbitrariadad d'autoritads. Sch'i na dat nagina mediaziun vegnan savens fatgas denunziats reciprocas da personas privatas ed autoritads. Quai chaschuna lavur smesirada e custs excessivs per la giustia.

Cun in post d'annunzia independent po vegnir cuntanschì in emprim giudicament extragiudizial nunbirocratic e svelt ed en il meglier cas er ina soluziun definitiva da cas bloccads cun posiziuns polarisadas.

Las sutsegnadras ed ils sutsegnaders vulessan perquai savair da la Regenza:

1. È la Regenza er da l'avis da las sutsegnadras e dals sutsegnaders, ch'in post d'annunzia independent purtass ina distgargia e schanegiass las resursas da las autoritads involvidas, da las personas privatas pertutgadas e la finala er da la giustia?
2. Tge experientschas han fatg ils auters chantuns, che han gia posts sumegliants (Friburg, Turitg, Vad, Basilea-Citad, Basilea-Champagna, Geneva e Zug)?
3. Quant enavant po il post da mediaziun independent, ch'è vegnì stgaffi da nov en il rom da la revisiun da la Lescha dal persunal e ch'è competent per abus en il sector dal persunal entaifer l'administraziun, vegnir incumbensà d'elavurar conflicts tranter las autoritads e personas privatas?

Cuira, ils 14 da favrer 2024

Bardill, Tomaschett, Pfäffli, Atanes, Bachmann, Baselgia, Biert, Bisculm Jörg, Cahenzli-Philipp, Degiacomi, Derungs, Dietrich, Gartmann-Albin, Gredig, Hoch, Kaiser, Kreiliger, Mazzetta, Müller, Nicolay, Perl, Preisig, Rettich, Rusch Nigg, Rutishauser, Walser, Wieland, Wilhelm